

3 योहान

योहान रासता मूडो सिट्टिटे

इद सिट्टिटेता बारेमते गिचचो परिचयम

रासतोना पोरोल: योहान

रासता कालम: इसवि सन 85-95

अद कालमते तप्पुड बोदां कराहनोर वेल्लेन मंदि वासि कलिसियातुन पाड किय्युंदुर. गानि अवेटाल इच्चुर सत्तेम बोदां कराहनोरगुडा मत्तुर. अय्ते कलिसियाते पेद्दा इंचि निल्ला मनकल, कलिसियाता कळमातोर्कुन आनि पलाताल कलिसियाते वायाना हेडमितोर्कुन बल्हा हळकुनना? इदुना बारेमते योहान रासतोर. तप्पुड बोदानोर्कुन एरपाट कीसि ओरागटाल लक्कु मनना आनि सत्तेम बोदां कराहनोर्कुंक सहायम कियाना, इल्हा अंटोर्कुनगुडा कलिसियाता पेद्दा मनकल बेस हळकुनागोम इंचि योहान इद सिट्टिटेते रासतोर.

बगा बतल मंता

जोहार आनि परिचयम 1-4

गयेसुंक जोहार वेहमळ 5-8

दियुतिरपेसना बारेमते 9-10

देमेतिरयुसना बारेमते 11-12

आकिरता बोदां 13-15

योहानुनाहेंदाल गयेसुंक जोहार

1 नना योहानुन, कलिसियाते बेस पोरोल होत्ता वरोन मनकन आंदुन. नना बोन अय्ते निजमते पावरम कीतन आ गयुसुंक इद सिट्टिटे रासेक मंतन.

2 पावरमगल्ला दंटातोना! निमे बक्तिते पेनतोनि बल्हा बेस मंचंतिनो, अन्नि पोल्लेनेगुडा निमे अल्हेने मन, नीकु बदे रोगम वायाकौंटा निमे बस्केळ्ळक सुकमते मनना इंचि नना पारतना कीसेके मंतन.

3 बारित्ते, गयुस निजमे सत्तेमते ताकसंतोर इंचि इच्चुर दादालोर निहागटाल वासि, नीवा बारेमते गवाइ वेहतुर. अदुन केंजसि नाकु वेल्लेन कुसि आता.

4 नावा पिलाल्क सत्तेमते ताकसेक मंतुर, इत्ता पोल्ले नाकु वेल्लेन कुसितुन हीता. दीनकु तप्पा इंका बद्दे पोल्ले केंजसि नाकु इच्चोन कुसि आयो.

5 पावरमगल्ला दंटातोना! निमे एरपाट कियवोर निहगा वायिनागानि, वाता दादालोराहाटी निमे बतल अय्ते कीतिनो, अद निमे वेल्ले विस्वासमतोनि कीतिन.

6 ओर दादालोर नीवा पावरमता बारेमता गवाइ कलिसियाते वेहतुर. पेनदा लोकल्लुकुन बल्हा अय्ते साल्ती कीतुरो अल्हा, निमे ओरा सेवा कीसि साल्ती कियानय्ते, नीवाहाटी इंका बेस मनंता.

7 बारित्ते ओर किरिस्तुना सेवाहाटी पेयस्तुर आंद. विस्वासम कियवोराहेंदाल ओर बतले सहायम येतुर.

8 असोटा मनकालोर्कुं मनम सहायम कीसि ओर्कुन बेस हळना. अस्के मनमगुडा सत्तेमताहाटी कबळ कियानोरा लेक्काते वांतोम.

दियुतिरपेस आनि देमेतिरयुस

9 नना कलिसियातोरक उंदि सिट्टि रासि लोहतन. गानि कलिसियाते पेद्दा आयालय हळना दियुतिरपेस इनानोर नना वेहानदुन ओप्कुंचेक हिल्लोर.

10 अचोने आयका, कलिसियाते पूने वायाना विस्वासुल्लुकुन ओर अय्ते बेस हळोर आनि हळकुंतोम इनानोर्कुनगुडा बेस हळ्हा हिय्योर. इंका बोर अय्ते बेस हळकुंतुरो ओर्कुन कलिसियाताल पलाते पेच्हांतोर. मावा बारेमते कराब-कराब पोल्लें वळ्ळंतोर, अदुनहाटी नना बस्के अय्ते वांतन, अस्के ओना बारेमते कलिसियाते अंतोर्क वेहांतन.

11 पावरमगल्ला दंटातोना! निमे ओनालेसीं कराबता जोलिक होन्मा, सिराप बेस बतल अदे कीसेके मन. बेसता कबाहक कियानोर पेनदा मनकल आंदुर, सेड्डा कबाहक कियानोर पेनदा मनकल आयोर.

12 देमेतिरियुसना बारेमते अंतोरगुडा बेसतोर इंचि गवाइ वेहांतुर. पेनदा सत्तेमते ताकतोर इंचि सत्तेमता नदरतेगुडा ओर बेस मनकल आंदुर. ओर बेसतोर इंचि ननागुडा गवाइ हीतन, नावा गवाइ सत्तेम इंचि मीकु अय्ते एरपाटे मंता.

आकिरता जोहार

13 नीकु वेहालय नहगा इंका वेल्लेन पोल्लें मंतां, गानि साइतोनि ई कायदोमते रासमळ नाकु इस्टम हिल्ले.

14 बिरानेन नीकु कलियना इंचि नना आसे पडसेक मंतन. कलियतस्के, मनम मोकोम मुन्नेन वळ्ळुकुनकोम.

15 पेन बाबल हिय्यना सांति बस्केळ्ळक नीतोनि मन्निकांटी. इग्गेटा नीवा दंटागाहक नीकु जोहार वेहासेक मंतुर. अगा मनना अंटोर दंटागाहकुंक पोरोल येत्सि नावा जोहार वेहा.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068